

## **Q. Horati Flacci**

### **Carminum - Liber I**

9

Vides ut alta stet niue candidum  
Soracte, nec iam sustineant onus  
siluae laborantes, geluque  
flumina constiterint acuto?  
Dissolue frigus ligna super foco  
large reponens atque benignius  
deprome quadrimum Sabina,  
o Thaliarche, merum diota.  
Permitte diuis cetera, qui simul  
strauere uentos aequore feruido  
deproeliantis, nec cupressi  
nec ueteres agitantur orni.  
Quid sit futurum cras fuge quaerere e  
quem Fors dierum cumque dabit lucro  
appone, nec dulcis amores  
sperne puer neque tu choreas,  
donec uirenti canities abest  
morosa. Nunc et Campus et areae  
lenesque sub noctem susurri  
composita repetantur hora,  
nunc et latentis proditor intimo  
gratus puellae risus ab angulo  
pignusque dereptum lacertis  
aut digito male pertinaci.

11

Tu ne quaesieris, scire nefas, quem mihi, quem tibi  
finem di dederint, Leuconoe, nec Babylonios  
temptaris numeros. Vt melius, quidquid erit, pati,  
seu pluris hiemes seu tribuit Iuppiter ultimam,  
quae nunc oppositis debilitat pumicibus mare  
Tyrrhenum! Sapias, uina liques et spatio breui  
spem longam reseces. Dum loquimur, fugerit inuida  
aetas. Carpe diem, quam minimum credula postero.

22

Integer uitae scelerisque purus  
non eget Mauris iaculis neque arcu  
nec uenenatis grauida sagittis,  
Fusce, pharetra,  
siue per Syrtis iter aestuosas  
siue facturus per inhospitalem  
Caucasum uel quae loca fabulosus  
lambit Hydaspes.

Namque me silua lupus in Sabina,  
dum meam canto Lalagen et ultra  
terminum curis uagor expeditis,  
fugit inermem;  
quale portentum neque militaris  
Daunias latis alit aesculetis  
nec Iubae tellus generat, leonum  
arida nutrix.

Pone me pigris ubi nulla campis  
arbor aestiua recreatur aura,  
quod latus mundi nebulae malusque  
Iuppiter urget;  
pone sub curru nimium propinqui  
solis in terra domibus negata:  
dulce ridentem Lalagen amabo,  
dulce loquentem.

5

Quis multa gracilis te puer in rosa  
perfusus liquidis urget odoribus  
grato, Pyrrha, sub antro?  
Cui flauam religas comam,  
simplex munditiis? Heu, quotiens fidem  
mutatosque deos flebit! Vt aspera  
nigris aequora uentis  
emirabitur insolens,  
qui nunc te fruitur credulus aurea,  
qui semper uacuam, semper amabilem  
sperat, nescius aurae  
fallacis! Miseri, quibus  
intemptata nites! Me tabula sacer  
uotiuua paries indicat uuida  
suspendisse potenti  
uestimenta maris deo.

38

Persicos odi, puer, apparatus.  
Displicent nexae philyra coronae;  
mitte sectari, rosa quo locorum  
sera moretur.  
Simplici myrto nihil allabores  
sedulus curo. Neque te ministrum  
dedecet myrtus neque me sub arta  
uite bibentem.

## Carminum - Liber II

8

Vlla si iuris tibi peierati  
poena, Barine, nocuisset umquam,  
dente si nigro fieres uel albo  
turpior ungui,  
crederem; sed tu, simul obligasti  
perfidum uotis caput, enitescis  
pulchrior multo iuuenumque prodis  
publica cura.  
Expedit matris cineres opertos  
fallere et toto taciturna noctis  
signa cum caelo gelidaque diuos  
morte carentis.  
Ridet hoc, inquam, Venus ipsa, rident  
simplices Nymphae ferus et Cupido,  
semper ardentis acuens sagittas  
cote cruenta.  
Adde quod pubes tibi crescit omnis,  
seruitus +crescit+ noua, nec priore  
impiae tectum dominae relinquunt  
saepe minati.  
te suis matres metuunt iuencis,  
te senes parci miseraeque nuper  
uirgines nuptae, tua ne retardet  
aura maritos.

14

Eheu fugaces, Postume, Postume,  
labuntur anni, nec pietas moram  
rugis et instanti senectae  
afferet indomitaeque morti,  
non si trecenis quotquot eunt dies,  
amice, places illacrimabilem  
Plutona tauris, qui ter amplum  
Geryonen Tityonque tristi

compescit unda, scilicet omnibus  
quicumque terrae munere uescimur  
enauganda, siue reges  
siue inopes erimus coloni.  
Frustra cruento Marte carebimus  
fractisque rauci fluctibus Hadriae,  
frustra per autumnos nocentem  
corporibus metuemus Austrum:  
uisendus ater flumine languido  
Cocytos errans et Danaï genus  
infame damnatusque longi  
Sisyphus Aeolides laboris.  
Linquenda tellus et domus et placens  
uxor, neque harum quas colis arborum  
te praeter inuisas cupressos  
ulla breuem dominum sequetur.  
Absumet heres Caecuba dignior  
seruata centum clauibus et mero  
tinget pauimentum superbo,  
pontificum potiore cenis.

### **Carminum - Liber III**

7

Quid fles, Asterie, quem tibi candidi  
primo restituent uere Fauonii  
Thyna merce beatum,  
constantis iuuenem fide,  
Gygen? Ille Notis actus ad Oricum  
post insana Caprae sidera frigidas  
noctes non sine multis  
insomnis lacrimis agit.  
Atqui sollicitae nuntius hospitae,  
suspirare Chloen et miseram tuis  
dicens ignibus uri,  
temptat mille uafere modis.  
Vt Proetum mulier perfida credulum  
falsis impulerit criminibus nimis  
casto Bellerophontae  
maturare necem refert;  
narrat paene datum Pelea Tartaro  
Magnessam Hippolyten dum fugit abstinens,  
et peccare docentis  
fallax historias mouet,  
frustra. Nam scopulis surdior Icari

uoces audit adhuc integer. At tibi  
ne uicinus Enipeus  
plus iusto placeat caue,  
quamuis non alius flectere equum sciens  
aeque conspicitur gramine Martio,  
nec quisquam citus aequae  
Tusco denatat alueo.  
Prima nocte domum claude neque in uias  
sub cantu querulae despice tibiae,  
et te saepe uocanti  
duram difficilis mane.

9

"Donec gratus eram tibi  
nec quisquam potior bracchia candidae  
ceruici iuuenis dabat,  
Persarum uigui rege beatior".  
"Donec non alia magis  
arsisti neque erat Lydia post Chloen,  
multi Lydia nominis  
Romana uigui clarior Iliia".  
"Me nunc Thressa Chloe regit,  
dulcis docta modos et citharae sciens,  
pro qua non metuum mori,  
si parcent animae fata superstiti".  
"Me torret face mutua  
Thurini Calais filius Ornyti,  
pro quo bis patiar mori  
si parcent puero fata superstiti".  
"Quid si prisca redit Venus  
diductosque iugo cogit aeneo,  
si flaua excutitur Chloe  
reiectoque patet ianua Lydiae?"  
"Quamquam sidere pulchrior  
ille est, tu leuior cortice et improbo  
iracundior Hadria,  
tecum uiuere amem, tecum obeam libens".

10

Extremum Tanain si biberes, Lyce,  
saeuo nupta uiro, me tamen asperas  
porrectum ante foris obicere incolis  
plorares Aquilonibus.  
Audis quo strepitu ianua, quo nemus  
inter pulchra satum tecta remugiat  
uentis, et positas ut glaciet niues  
puro numine Iuppiter?  
Ingratam Veneri pone superbiam,

ne currente retro funis est rota.  
Non te Penelopen difficilem procis  
Tyrrenus genuit parens.  
O quamuis neque te munera nec preces  
nec tinctus uiola pallor amantium  
nec uir Pieria paelice saucius  
curuat, supplicibus tuis  
parcas, nec rigida mollior aesculo  
nec Mauris animum mitior anguibus.  
Non hoc semper erit liminis aut aquae  
caelestis patiens latus.

12

Miserarum est neque amanti dare ludum neque dulci  
mala uino lauere, aut exanimari metuentis  
patruae uerbera linguae.  
Tibi qualum Cythereae puer ales, tibi telas  
operosaeque Mineruae studium aufert, Neobule,  
Liparaei nitor Hebri,  
simul unctos Tiberinis umeros lauit in undis,  
eques ipso melior Bellerophonte, neque pugno  
neque segni pede uictus,  
catus idem per apertum fugientis agitato  
grege ceruos iaculati et celer arto latitantem  
fruticeto excipere aprum.